

Høring – Skjøtselsplan for Mysubytta landskapsvernområde

Vi viser til vedlagde dokument, og legg med dette «Utkast til Skjøtselsplan for heilskapleg kulturlandskap – Mysubytta landskapsvernområde, Skjåk i Oppland» ut på høring. Frist for innspel er 1.august 2017.

Breheimen nasjonalparkstyre er ansvarleg for forvaltninga av Mysubytta landskapsvernområde og at det vert utarbeidd ein skjøtselsplan. Etter oppdrag frå nasjonalparkstyret har Norsk Institutt For Bioøkonomi (NIBIO) utarbeidd utkastet til skjøtselsplan som no vert sendt på høring.

Bakgrunn

Bakgrunnen for arbeidet med skjøtselsplan er vedtaket om vern av Mysubytta landskapsvernområde den 7. august 2009 (jf. naturmangfaldlova § 36 og verneforskrifta § 6) og Forvaltningsplan for verneområda i Breheimen (endeleg vedteken 01.03.2017).

Formålet med landskapsvernområdet er å ta vare på eit verdifullt setermiljø, vegetasjon og kulturminne som utgjør ein vesentleg del av landskapet sin eigenart. Vidare ta vare på eit stor samanhengande naturområde med rikt dyre- og planteliv som pregar landskapet. I tillegg ta vare på geologiske førekomster, samt landskapsformer og vakker serprega vassdragsnatur.

Heilskaplege kulturlandskap og dei kulturavhengige naturtypene er avhengige av tradisjonell drift eller målretta skjøtsel. Målet med skjøtselsplanen er å gi råd både om naudsynte restaureringstiltak og om skjøtselstiltak som bør kome etterpå. Utgangspunktet for måla og tiltaka i skjøtselsplanen er dei biologiske verdiane som finst i området, og korleis ein ynskjer å ta vare på dei.

Arbeidsform

Då arbeidet med skjøtselsplanen starta opp sende Breheimen nasjonalparkstyre ut ei orientering om oppstart for arbeidet med invitasjon til oppstartsmøte og synfaringar. Brevet gjekk ut til alle grunneigarar, brukarar og lokale lag, interesseforeiningar med interesser knytt til landskapsvernområdet. NIBIO utførde feltarbeidet med kartlegging av naturtypar sommaren 2016. Aktuelle problemstillingar knytt til restaurering og skjøtsel vart kartlagt. I utkastet til skjøtselsplan har NIBIO;

- utforma utkast til bevaringsmål for dei representative naturtypene
- utforma utkast for restaurerings- og skjøtselstiltak for representative naturtypar
- inkludert den lokale kunnskapen om dei tradisjonelle bruksmåtene
- teke omsyn til kulturminne knytt til dei kulturavhengige naturtypene

Utkastet vart sendt til nasjonalparkstyret for gjennomsyn og tilbakemelding vinteren 2016/2017. Nasjonalparkstyret inviterte til ope møte i Bjørkås i Bråtå den 24. april 2017 der NIBIO presenterte innhaldet i skjøtselsplanen. Utkastet vart sendt til grunneigarar, bruksrettshavarar og hytteigarar i området for kvalitetssikring, innspel og tilbakemelding i forkant av møtet.

Nasjonalparkstyret vil vurdere kvart einskild innspel som kjem inn under høyringa med sikte på å innarbeide dei i skjøtselsplanen. Endeleg utkast til Skjøtselsplan vil bli utarbeidd med bakgrunn i høyringa. Vi tek sikte på å legge endeleg utkast til Skjøtselsplan fram for Rådgjevande utval i Breheimen etter høyringa, hausten 2017. Det er nasjonalparkstyret som endeleg godkjenner skjøtselsplanen, og skjøtselsplanen vil bli lagt fram for nasjonalparkstyret for endeleg godkjenning etter at den er presentert for Rådgjevande utval.

Høyringsdokumentet

Dokumentet består av to delar:

- Ein spesiell del som omhandlar «*Utkast til Skjøtselsplan for heilskapleg kulturlandskap Mysubytta landskapsvernområde*», med vedlegg. Vedlegget er artsliste med artar som er registrert i dei ulike naturtypelokalitetane.
- Ein generell del «*Tilråding til generell del for mal til skjøtselsplanar for heilskaplege kulturlandskap*». Denne delen omhandlar heilskaplege kulturlandskap, utvikling og implementering av skjøtselsplan, verdiar i kulturlandskapet generelt, og generelle råd for restaurering og skjøtsel i kulturlandskap.

Vi gjer merksam på at skjøtselsplan for Mysubytta (punkt ein ovanfor) dels bygger på den generelle delen med t.d. generelle råd for restaurering og skjøtsel i kulturlandskap.

Kulturlandskapsverdiene i Mysubytta og prioritering av aktuelle tiltak

Forslaga til tiltak i skjøtselsplanen er basert på faglege vurderingar og innspel frå bruksrettshavarane og grunneigar. Listene med føreslegne tiltak er omfattande, og av omsyn til tilgjengelege ressursar vil nasjonalparkstyret truleg måtte prioritere kva nye tiltak som skal setjast i gong i samarbeid med bruksrettshavarane og grunneigar.. Ved vurdering av igangsetting av nye tiltak vil ein vektlegge om bruksrettshavaren/grunneigaren er motivert for å drive skjøtsel, då utsikt til kontinuitet i skjøtselen er avgjerande. Nasjonalparkstyret vil frå 2018 gjere følgjande prioritering, avhengig av tilgjengelege ressursar og tett samarbeid med grunneigar:

1. Vidareføring av pågåande tiltak og aktivitet.
2. Setje i gong nye tiltak i tråd med skjøtselsplan

Dersom område/lokalitetar/stølar ikkje er nemnde i planen tyder ikkje det at det ikkje er aktuelt å gjere tiltak i slike område, men det som er forankra i planen har ein prioritet.

Dersom nokon ynskjer å setje i gong nye tiltak er det viktig at det vert meldt inn til nasjonalparkforvaltaren innan oktober kvart år.

Kva ynskjer vi tilbakemelding på i høyringa?

Alle som har interesser i områda eller som har meiningar om innhaldet i skjøtselsplan for Mysubytta er velkommen til å uttale seg.

Vi ynskjer særleg innspel på innhaldet i «*Utkast til Skjøtselsplan for heilskapleg kulturlandskap Mysubytta landskapsvernområde*», og som omhandlar følgjande tema:

- Forslaga til tiltak. For kvar naturtype (naturbeitemark, sørvendt berg og rasmark og rydding/tytning av skog langs Mysubyttvegen) er det lista opp som aktuelle skjøtselsbehov og ei prioritert tiltaksliste.
- Faktafeil. Dersom det skulle vere feil fakta i lokalitetskildringane, særleg avsnitta kalla «Lokalisering og naturgrunnlag», ynskjer vi å få rette opp dette.

Høyringsdokumentet er tilgjengeleg frå heimeside vår: www.nasjonalparkstyre.no/Breheimen eller du kan få det tilsendt ved å kontakte nasjonalparkforvaltaren. (Dokumentet er det same som vart presentert i ope møte på Bjørkås i Bråtå den 24. april 2017).

Frist for å uttale seg til framlegget er 1. august 2017. Vi ber om at uttalen vert sendt på e-post til fmoppst@fylkesmannen.no. Uttalen kan også sendast til Breheimen nasjonalparkstyre, Postboks 987, 2626 Lillehammer.

Kontakt

Har de spørsmål til skjøtselsplanen, ta kontakt med nasjonalparkforvaltaren:
Bjørn Dalen – telefon 977 37 221 e-post fmopbda@fylkesmannen.no

Vennleg helsing

Marit Aakre Tennø

Styreleiar Breheimen nasjonalparkstyre